




東華續錄

光緒九十八

臣朱壽朋敬編

臣沈彭年恭校

三月庚午朔諭李瀚章奏拿獲著名海盜請將出力人員獎勵一摺廣東濱海等處盜匪設立堂名肆行劫掠久爲閭閻巨患其中匪首臘魚全一名多年稔惡糾集黨與在廣東一帶洋面出沒靡常時至內地搶劫並殺傷事主拒斃官兵犯案不計次數現經李瀚章會同提督方耀督飭署副將何長清奮力搜捕將該犯擒獲正法奪獲賊船五隻賊械多件並緝獲各堂匪首八名匪黨多名分別懲辦在事出力員弁不無微勞足錄署香山協副將何長清署香山縣知縣李徵庸游擊丁志澂盧滿江副將黃金福均著交部從優議敘把總長虹著以千總補用並加都司銜署把總武舉麥國昌把總何長祺均著以千總卽補並加守備銜千總陳到把總梁榮均著加守備銜以示鼓勵○諭京師入春後雨澤稀少朕此次自東陵回京沿途查看麥苗情形雖尙葱鬱惟時值布種早秋農田亟盼渥澤允宜虔申祈禱朕於本月初四日親詣 大高殿拈香 時應宮著派員勒載灋 昭顯廟著派員勒載灋 宣仁廟著派員勒載灋 凝和廟著派員子奕謨同於是日分詣拈香○辛未諭光祿寺卿裴蔭森著來京供職所有船政事務著

派閩浙總督卞寶第兼管○諭朕欽奉 慈禧端佑康頤昭豫莊誠壽恭欽獻皇太后懿旨福建臺灣巡

撫劉銘傳著幫辦海軍事務○李瀚章奏查廣州沿海地方素多盜匪廣州府屬南海番禺順德各縣尤

甚伺便行劫饑則連檣結黨而來飽則鼓棹揚帆而去官兵捕治輒敢拒敵殺傷創設堂名到處打單勒

收行水等類打單一事由來已久其索取資財多寡尙無一定勒收行水始自近年亦與打單無異專向

巨商大賈勒索多贓如磚窰油榨糖寮園各渡船木簰每歲皆有定數稍拂其意暗縱黨與將所積貨物

概行焚燬較之持械尤爲可惡所有盜案情形及劣紳豪棍包庇窩留積習迭經前督臣張之洞剴切奏

陳故上年秋間添募勇船派令署廣州協副將黃金福等於南海番禺順德三縣分爲六路搜緝亦經奏

明在案臣前在廣東稔知粵盜久爲民患抵任後復留心諮訪竊以除暴安良尤爲目前當務之急惟治

盜必須任用得人於事始克有濟水師提督方耀才略優長前辦潮州積匪著有成效該提督向駐虎門

於港澳出入處所最爲熟悉且在粵治軍日久紳民相洽與各處團練尤易聯絡臣於去冬十一月間卽

將三縣各路緝捕事宜統歸該提督就近籌辦督同原派副將黃金福各員暨臣添派委員等認真防緝

並出示嚴禁凡有打單暨行水銀兩不准交付免濟盜糧倘匪徒仍前索取卽擒送行營懲辦並據該提

督酌擬章程清查內匪責成各族長將該鄉族匪網送究治不准匪族劣紳再蹈包庇舊習一面聯合沿

海沙團沙艇整飭原有拖船扒船遇有外來盜劫協力兜拿疊准咨報督率員弁拿獲盜匪七十五名其審明疊劫有案先行就地正法者四十六名餘犯仍嚴行審究分別辦理數月以來盜案漸稀現准部咨將新添各路勇船分別裁減臣會同該提督詳加察核各處市鎮繁多素稱饒沃若防緝稍疏誠恐匪勢復熾爲害非淺當將新勇挑留六百名業已另案奏明仍交各員分帶並將原有各營之拖扒各船切實經理亦可勉強分布此臣整頓捕務之實在情形也伏查籌辦盜匪與戡亂禦敵大有不同惟在熟悉情形密查盜蹤相機擒捕並須嚴查內匪重辦窩家其匪族劣紳徇情袒庇者從嚴革究遇有擒匪送案立予審辦不稍留難商民無所畏忌其打單行水銀兩自可禁絕該匪等內無勾引窩留之處外無勒索接濟之賊庶幾盜源可清地方日臻靜謐水師提督方耀情形最熟辦理固屬裕如臣仍當勤加籌畫酌量輕重妥協商辦期安黎庶而靖海隅下部知之○壬申諭御史文郁奏佃租案審辦多歧請飭部仍照舊例提京訊結著戶部議奏○裴蔭森奏閩廠於光緒十三年十一月間開造石船臨經臣奏報在案當夫開挖伊始匠作日數百人時有乘潮趕辦工程非有專駐之員梭巡督率難保無偷惰誤工臣察度情事於開工之後卽派委員二員一員月薪水銀三十兩一員月薪水銀二十兩差弁兩員每員月薪水銀六兩列入是年員弁名單四柱冊內作爲專添員額咨報戶部備案嗣准部咨以閩廠員弁悉以兩

次奏單內定額不應再有添派且船塢之設係因舊設船槽額用已久始另修船塢一所或令各廠差使較簡之員分辦或令船槽原設員弁兼辦自無不可所有新添員弁均應刪除等因經臣將不能分辦兼辦情形備咨聲覆復准來咨以如因船塢開挖伊始非專設員弁不足以資遣用亦應將實在情形詳細敘明奏請添派此時未便據咨率准等因咨覆前來竊維製造經費有可略從節省者無不力求節省惟是新塢工程繁重其地距船廠將及三里舊槽日有工作原設船槽員弁各日有專司卽各廠差使之員經戶部照單刪裁後常苦不敷遣用就中欲籌兼辦則勢有不能欲籌分辦則人患不足合無仰懇 天恩准予暫添船塢委員二員差弁二員薪水均自開造船塢之日起支將來石塢告成此項暫添員弁或留或撤仍隨時察看期於工無曠誤欸不虛糜下部議奏○升泰奏奴才前由仁進岡赴獨脊嶺會議邊事曾將起程日期由營奏報及抵獨脊嶺後又復電陳總理各國事務衙門各在案本年正月十七日准赫政函稱接奉京電正月初九日奉 上諭駐藏幫辦大臣升泰著作爲全權大臣與大英國所派全權大臣定約畫押欽此奴才受任愈重兢惕愈深邇來連日商辦藏番屢以條約只將哲孟雄劃歸英國言甚切實而游牧一層尙須隨後商訂番情疑慮再四瑣瀆經奴才飭令委員切實開導許以將來游牧一事必須照舊該番始無他言前議四欸均已定議伏思此案彼族深謀熟計反側靡常悉賴總署王大臣

盡心區畫與英使再三籌議不知費幾許唇舌而總稅務司赫德與赫政往復電達通詞亦極謹密邊事始得藉以結局昨准保爾文開英廷已派印督爲全權大臣約奴才赴印彼此書押畫字奴才查前接總理各國事務衙門來電亦有或在孟加臘城立約之語該英人必欲在印度立約彼國所派全權大臣卽係印督奴才既已到嶺亦惟有速赴印洋從速了結茲於光緒十六年二月十六日隨帶邊務委員嵇志文及約束弁兵之總兵張鵬蛟由獨脊嶺前赴孟加臘城與印督立約畫字至分界及界外游牧各事均已再三斟酌到彼當無異議下所司知之○癸酉 上詣 大高殿祈雨○丙子諭都察院奏河南已革

教諭王恂之以知縣挾嫌捏詳填入大計冤抑難伸等詞赴該衙門呈訴所控是否屬實著倪文蔚秉公查訊據實具奏原呈王恂之該部照例解往備質○諭都察院奏直隸河間縣民人劉雲龐狄化雲等以派差苦累浮收地丁等詞赴該衙門呈訴控關官吏擾民虛實均應澈底根究著李鴻章提集人證秉公嚴訊據實具奏原呈民人劉雲龐等該部照例解往備質○辛巳 上詣 大高殿 宣仁廟祈雨○乙

酉剛毅奏寶山縣蘊草洪河道淤塞招集民夫乘時開挑以工代賑暨抽撥營勇通力合作臣擬親往河工指授以期竣事妥速業經奏明在案於二月十六日到工後督委候補知府周遵會同各營官沿河逐段勘量裁度工段之難易均勻派撥營勇民夫分挑築壩厚水從事布置現有頭緒應卽分飭各該印

委員弁等監視兵民妥爲挑辦臣可毋庸久駐河工茲於二月二十五日旋省回署辦公仍俟該河全工挑竣再行前往驗收另行奏報報聞○丙戌諭馬丕瑤奏特參廢弛營務之提督請旨懲辦一摺記名提督唐本有管帶廣西防營駐紮全州界首地方侵蝕曠懷懲缺不補迨該撫委員接替臨時輒以疲弱充數軍械多不齊整並有剋剝營私擅役勇丁各情唐本有著卽行革職以肅軍政○庚寅 上復詣 大高殿祈雨○辛卯卞寶第奏福建福清縣轄之南日地方週圍八十餘里屹立海中孤懸一島四面水洋環繞異常荒僻素爲盜匪出沒之區該處雖有海壇營派防兵丁三十名兵少匪多不敷巡緝近來盜風愈熾劫掠頻仍雖經臣派委道員劉倬雲商同水師提臣彭楚漢嚴飭將備各官乘坐師船設法捕拿弋獲著名巨盜先後盡法懲辦匪膽稍寒然尙有船來賊去船去賊來之說非多撥弁兵前往駐紮防守不足以資鎮懾同治五年間前水師提臣李成謀咨商前督臣左宗棠於海壇撥守備把總帶兵二百名赴南日駐紮以資彈壓旋議將海壇右營改爲都司移駐南日李成謀與前署海壇總兵郭定猷親往履勘擇定地基擬建衙署兵房等項未經定議李成謀調補長江水師提督嗣署海壇鎮總兵賴鎮海與李成謀素有芥蒂盡翻其說謂南日安營設防諸多不便稟咨督撫頓罷前議臣查閱賴鎮海稟詞多屬虛浮如所稟南日距海壇水洋三百餘里之遙呼應不靈其實僅一百二十里順風半日可至所稟殊無足據

茲據水師提臣彭楚漢咨商擬就南日扼要建造兵房十數間外築四方圍牆仿照營壘規制於海壇水師協標之內撥派一哨九十名由營遴選幹練正副哨弁管帶馳往該處駐紮巡防庶奸民知有重兵駐守生其敬畏外匪亦不敢潛相勾結連而爲盜海疆可期安謐此次建造兵房圍牆工料必須結實經久且該島一切物料皆須購自外來價脚均形昂貴業經飭營撥節勘估約需銀九百餘兩所費似尙無多可否仰懇 天恩俯准照辦庶足戢盜風而安商旅下部知之○壬辰上詣 奉先殿 壽皇殿行禮

○癸巳諭李鴻章奏已故大員勤勞卓著請將事蹟宣付史館立傳一摺原任戶部右侍郎曾紀澤奉使各國克勤厥職嗣在總理衙門行走辦理中外交涉事宜諸臻妥協幫辦海軍事務一切規制贊畫頗多著將生平事蹟宣付國史館立傳並加恩予諡用示篤念盡臣有加無已至意○甲午張曜奏臣於上年十二月具奏請將曹州所屬濮州荷澤縣起至運河口止二百里河防撥歸河東河道總督管理恭奉

硃批該部議奏欽此經工部議奏請 飭下河東河道總督妥籌具奏等因欽奉 諭旨依議欽此欽遵

咨行到東臣查部臣原奏內稱山東河防九百餘里撫臣督率修防實有顧此失彼之虞東河總督所轄僅存現有七廳工程實已減於從前若將東境上游撥歸管理在河督多管二百里既非有加於舊制而山東巡撫少管二百里即可專力於下游一轉移間而繁簡難易適得其平等語是部臣亦深知人力之

宜均而爲此度勢審時之議又以此段工程向由巡撫督率地方官兼管河督恐呼應不靈事屬更張恐多窒礙等語在部臣慎重河防不能再三詳審臣查向來沿河州縣本歸河臣兼轄從前黃河南徙之時山東曹縣單縣均有河工卽歸河臣兼轄至今曹州府及曹單兩縣題補員缺仍會河臣銜名遇有功過河臣亦應舉劾是尙無呼應不靈之患論者以河臣辦理河防則必設立廳汛專管費用較鉅不若地方官兼管爲較省此實因噎廢食之論河工用款之多寡視工程之夷險爲衡險工多則用款亦多查上游直隸河防不及百里向來防汛用款不過十萬兩上年用至二十四萬兩山東上游二百里額定防汛經費銀八萬兩上年用至十八萬兩統計運河以西兩省河防不及三百里用至四十二萬兩又安得謂之省費至於從前河工糜費競尙奢華而風氣轉移在於大吏前河臣嚴烺由河工微末之員洊升河督在任十年弊絕風清欸歸實用是大法小廉非河廳之官皆不肖也河工廳汛轄境分明而實任之員專責綦嚴一切修防必存久遠之見河營官兵均係子孫相傳生長河干河務練習今山東上游有河五州縣其城距河皆五六十里不等州縣有地方應辦公事黃河汛漲險工瞬息爲患州縣未能常川駐工每易誤事如將上游河防撥歸河督管理設立廳汛專員責成下游七百里河防臣變通接續辦理以爲長久之計臣爲因時制宜起見可否仰懇 天恩勅下東河督臣一併籌議下工部知之○乙未諭前據給

事中張元普奏請飭興修浙江南湖水利並參嘉興縣知縣王晉玉壓擱賑務等語當經諭令崧駿查覆
茲據查明覆陳此案王晉玉被參上年水災時該員樗蒲飲博每遇鄉民報災一概批駁希圖開徵並浮
收錢糧各節均查無其事惟該員在任年久諸務因循一切聽信幕友書差致招物議且精力就衰難期
振作王晉玉著卽勒令休致至餘杭縣之南湖關係浙西水利崧駿現已飭屬勘工卽著該撫督飭員紳
將潯河培堤各事宜妥爲辦理以衛農田○諭岐元劉秉璋奏查辦贍對番務破寨擒渠邊境敕定一摺
贍對番目撤拉雍珠與巴宗喇嘛勾結野番糾眾滋事經岐元等飭派署阜和協副將徐聯魁等密帶兵
勇馳往查辦殄斃首犯撤拉雍珠解散脅從後督隊圍攻官寨生擒巴宗喇嘛斬匪黨數名當將官寨收
復辦理尙爲妥速卽著岐元劉秉璋會商長庚升泰將巴宗喇嘛從嚴審辦並核定輕減賦役章程妥籌
善後以靖邊疆所有尤爲出力之記名提督署阜和協副將徐聯魁著俟有四川副將缺出不論班次先
儘借補其餘出力各員弁著准其擇尤保獎毋許冒濫○己亥沈秉成奏光緒十年安徽省籌辦江防在
於省城東門外及攔江磯南北兩岸暨東西梁山等處建造明暗礮臺石土營壘並藥彈兵房駁岸護堤
工作告成前撫臣具奏在案臣到任之時道經江上親臨閱看各該處臺座營盤均係瀕臨大江據險扼
要足以自固門戶而兼爲上游藩籬惟每歲夏秋之交江潮大漲風濤震撼各有損傷歷經駐守防營修

葺完整上年八月間霖霖逾月江水泛濫大於往年加以連遇狂風波浪洶湧日久衝激損壞較多情
形甚重據駐紮各該處防營將領先後稟請勘估興修當委營務處安廬淦和道丁峻馳往分別會勘茲
據覆稱省城東門外原造明礮臺一座暗礮臺一座石營一座攔江磯北岸原造明礮臺二座石營一座
南岸原造明礮臺一座土營一座西梁山原造明礮臺四座石營一座土營二座礮臺左右各建藥彈兵
房而其前後均築駁岸護堤東梁山原造石城一道礮堤一道並藥彈兵房護以駁岸創造之日做法照
外洋式樣因平地植基慎固砌築穩堅現在周歷查勘以在沿江地方卑濕土性鬆浮洲岸坍長靡常大
致情形相等而其間省東門外對江中互沙洲江窄流急大水之際上游勢若建瓴汧汧奔騰直逼臺座
攔江磯突起江中洲上一經長水四面當衝洲地卸坍東基淹浸且對桐城縣境之三江口回溜湍悍衝
盪尤甚東西梁山夾江對峙橫入水中江形至此收束口門狹隘浪擊濤翻益爲迅猛險要之所爭在此
工程之受損亦在此所有礮臺石營及駁岸根脚多有刷洗下空木椿摧折牆身倒塌隙裂岌岌可危其
藥彈兵房久經風雨波濤亦多傾斜剝蝕均係實在情形若非及此修治將來坍塌愈多需款滋鉅而察
度江勘形勢亦稍變遷因地制宜有須拆卸截改及酌量移建方足以禦盛漲而固要防需用工料核實
估計約共須銀四萬數千兩請卽酌度核辦等情具稟前來臣查安徽省長江中貫地處要衝扼險設防

爲備豫不虞既據該道查明各處礮臺營壘坍塌確情亟應修改未敢因江表無事惜費因循擬卽遴委幹練大員鳩工庀材一律監修完固以期防患未然所估用欸相應奏明立案在於安徽省防軍餉需項下撥節動撥飭令實用實銷不准絲毫浮冒工竣之後彙入防軍用欸報銷案內另造清冊咨部核銷以重帑項得 旨如所請行○是月義大利國新簡駐華使臣潘薩抵任

夏四月庚子朔時享 太廟○廣西龍州電報與法屬越南北圻電報在鎮南關接綫○辛巳大祀 天

於 圖丘○諭張煦代奏劉錦棠瀝陳祖母病篤懇恩暫行開缺侍養並請收回加銜成命各摺片覽奏情辭迫切具見惻忱惟新疆爲西陲要地劉錦棠辦理一切深合機宜朝廷正資倚任著再賞假四箇月毋庸開缺仍俟伊祖母病體稍愈卽行回任以重職守前以行慶宣綸賞加該撫太子太保銜酬庸懋賞出自特恩毋庸固辭○唐炯奏 臣於上年十二月二十六日曾將各廠辦理實在情形覆陳在案茲據公

司稟稱廠中向規年終砂丁俱告假回家過年正月十五日前後始陸續回廠上班現俱照常攻採會理所募砂丁以道遠尙未如數齊集宣威會澤交界之煤山已設廠開辦仍恐開辦需時一面先將該處居民煅就之煤儘數購買多僱人夫牛車源源背運赴廠以免貽誤其餘各廠雖未大旺亦日有起色距巧家廠二百里小水井地方前經公司接濟油米令鄉民自行開鑿礮洞百餘口本年二月初間有四十餘

峒接礦現仍陸續接濟工本數年後該處可望成一大廠威寧鉛廠日有起色再得數月便可成功現在築塘蓄水以備淘洗礦砂修建鑪房以備煎鍊並於水城梅花山等處相度推廣開辦購買外洋機器現尚未到上海各等情前來臣覆查無異仍催令將九起二批京銅趕緊煎鍊陸續起解不准耽延下戶部知之○壬寅諭前兵部尙書彭玉麟忠清亮直卓著勲勤以諸生從戎轉戰東南各省所向有功會同原任大學士曾國藩創立長江水師籌畫精詳規模悉備歷受先朝知遇由知府洊擢封圻內陟卿貳追謚匪蕩平蒙穆宗毅皇帝眷念勲勞賞給一等輕車都尉世職並加太子少保銜朕御極後擢任兵部尙書嗣因患病迭次陳請開缺降旨允准仍派巡閱長江水師十餘年來力疾從公不辭勞怨復因病勢增劇請開差使當經寬予假期並准其回籍養病頒賜人參方冀調理就痊長資倚畀茲聞溘逝悼惜殊深彭玉麟著追贈太子太保銜照尙書例賜卹任內一切處分悉予開復應得卹典該衙門查例具奏加恩予諡並於立功省分建立專祠其生平戰功事蹟宣付國史館立傳伊孫候選員外郎彭見紳著以郎中選用見經見粹均著由吏部帶領引見用示篤念盡臣至意○甲辰諭劉瑞祺奏臬司年老多病呈請終養據情代奏一摺貴州按察使田國俊著准其開缺終養○以黃槐森爲貴州按察使○以李文田爲內閣學士○馬丕瑤奏吏治贊襄多資幕友而幕友把持最壞吏治廣西官吏經臣力加整頓似有各圖

自新之機仍有牢不可破之習則幕友之把持壞之也查臬司爲刑名總匯首府爲發審關鍵兩署幕友得人則通省之庶獄公平乃有劣幕朱文煒號香溪廣東人始則以筆札之私改就刑席繼則以夤緣之巧盤踞上游臬司首府兩席專擅近二十年把持陰險權重勢歸廣通聲氣四布黨徒每遇府廳州縣蒞事之初必有薦引非其門生卽其親友無論勝任與否一經關說不敢稍違常有身受重聘尋常案件亦不能辦者默察官場隱情不畏上司而畏該幕以上司未必久任該幕則永無更易也甚且恃爲奧援賴其彌縫上下相蒙諱命諱盜吏治之壞職此之由臣愚以爲欲清來源先除幕黨請 旨飭將該劣幕朱文煒驅逐出境永不許在廣西遊幕所有臬司首府兩署刑名另行分延品學兼優之士專司辦理其庸闇之門生親友及屬幕如有似此膽大妄爲跡涉把持者由臣隨時查察驅逐以破積習而清吏治得

旨如所請行○乙巳命孫家鼐兼署刑部尙書孫貽經兼署吏部左侍郎松澐署理都察院左都御史續昌兼署吏部右侍郎○丙午張曜奏地方屠宰耕牛例應嚴禁而山東頻年以來水患禁宰尤應認真惟每年有應解牛筋一千斤向歸省東各縣購買齊備由臬司詳請委員解京承辦各縣向例分派行戶發給價銀而行戶卽藉以分派各鄉集鎮其實百牛之筋足以敷用而各鄉藉此屠宰何止一二千之多近年以來牛價日昂竊牛之案層見疊出臣思農工耕地全賴牛力惟張家口一帶牛無耕地之功向以牛

肉爲食呼之爲菜牛視之與豕羊相同採買牛筋較爲近便臣與藩司籌商惟有仰懇 天恩勅下內務府由張家口採解備用所有例價銀一百零一兩一錢二分三釐並山東捐備解費銀四百兩一併解交內務府衙門以備採買之費如蒙 俞允實於農民大有裨益下該衙門議奏○署廣東巡撫布政使游智開以病免以李瀚章兼署廣東巡撫○以謝德標爲廣東布政使于蔭霖爲福建臺灣布政使○丁未諭前據御史文郁奏參通州知州張兆豐嚴押斃命重徵勒索等情當經諭令潘祖蔭等查奏茲據查明覆奏此案張兆豐被參玩視民命重徵糧稅各節均查無其事惟勒索斗行商人王永清月捐米石津貼押犯口糧雖係因公起見究屬不合張兆豐著卽開缺仍交部議處○曾國荃奏南洋各號兵輪前於光緒十年間經臣奏明歸長江水師提督李成謀總統節制近今海軍衙門定章南洋各船每年於春分後前赴北洋合操秋分後回防等因查南洋鏡清寶泰南琛南瑞開濟保民等船上年赴北洋會操因李成謀有長江水師之任未能久離職守派委輪船營務處開復提督記名總兵原銜吳安康率領前往吳安康辦理營務兼帶兵輪歷有年數於操巡訓練事宜講求有素所有鏡清等六船堪以派委統領並管帶寶泰兵輪以一事權查吳安康管帶寶泰未支薪水現既改爲統領費用較增應令照章支領管帶薪水卽以原支營務處薪水移作統領經費以資辦公其六船應辦事宜卽責成吳安康毋避嫌怨實力整頓

仍隨時報明總統李成謀察核庶南洋各兵輪分合進止督率有人似於巡防兩有裨益報聞○戊申定
安奏奉天營口地方前因辦理海防創設水雷營以資扼守陸續於外洋天津添置機械電綫棉花火藥
等件運解到營應設雷庫十間存放電綫軍械各器層疊堆集已無餘地棉花火藥性烈氣猛安置宜嚴
電綫內水綫一項必須有甜水蓄養庶免損傷若久置旱地膠性燥烈銹蝕堪虞擬在該營雷庫西偏添
蓋藥庫五間地盤築深七尺下用木樁木梁懸架木板上鋪細砂以扼地氣而抑地火四面磚牆兼用塞
門土三合土堅築厚四尺上蓋用青磚圍洞三合土塞門土封頂以杜木性生火每間開斜照窗二扇用
鐵條鐵網外照玻璃以防電氣牆內挖砌竹管以洩濕氣並於房外四角開井四眼各植圓徑二寸長二
丈四尺鐵柱一根以收天行電氣又於雷庫東偏添蓋電綫庫五間地盤築深九尺用塞門土三合土青
石磚塊砌築中間土地蓄注甜水以養水綫四圍磚牆灰頂木梁柱椽望板與藥庫同共實需工料銀五
千五百一十二兩二錢六分摺節估計並無浮冒據奉錦山海關道誠勳轉據雷營管帶千總劉奇坤營
口海防同知章樾造冊詳報奴才覆閱無異批飭在於營口七釐貨捐項下動欸興修已於上年四月初
七日卯時開工曾將做法丈尺清冊並繪圖咨報戶部工部查核在案茲准工部以此項工程銀數係千
兩以上應行奏明辦理等因咨覆前來奴才查明雷營所購棉花火藥水電綫價值既鉅物性各殊積數

已多看守不易必須另蓋房庫存儲方昭妥慎該道所請在於雷庫前東西兩邊修建庫房各五間專儲棉花藥水綫兩項實爲當務之急所需工料銀五千五百一十二兩二錢六分委已撙節估計毫無浮冒業由七釐貨捐項下動支應用所有工程亦已據報完竣下部知之○辛亥 上復詣 大高殿祈雨○祭 先蠶壇 皇后親詣行禮○諭孫開華現准來京陛見福建陸路提督著卞寶第兼署○壬子諭長順奏吉林省城失火自請議處並神靈顯應請頒匾額各摺片據稱本年三月二十五日吉林省城牛馬行不戒於火延燒官民房屋一千五百餘間經長順率屬詣城隍廟虔禱仰賴 神靈默佑火勢頓熄轉危爲安實深寅感發去御書匾額一方交長順祇領敬謹懸掛以答 神庥省城猝被火災長順疎於防範咎實難辭著交部議處被災各戶業經該將軍飭屬妥爲撫卹卽著認真經理毋任失所餘著照所議辦理另片奏將軍住宅擬另行擇地重建等語著該部議奏○以福銀爲山東布政使曹秉哲爲山東按察使○癸丑予故福建按察使徐文達事蹟交國史館立傳○以許鈴身爲福建按察使○升泰奏奴才於二月二十日由獨脊嶺拜摺後附輪車啟程次日午刻卽抵孟加臘與英國所派全權大臣印度總督蘭士丹會商換約日期旋定於二月二十七日奴才帶同隨行各員該印督蘭士丹率其所屬外部各官均在印督署中彼此各將所奉 諭旨對衆宣讀卽將商定各條約校對明晰並無異議卽行畫押換約